

【自由】李淑娟原作

自由，係一種力量，一種夢想，一生人个追求，因為自由做得帶來快樂。頭擺到這下幾多人為著自由打拚，斯算付出錢銀、犧牲生命也毋驚。佢姆就係一個「無自由，甘願死」个人！

佢屋下附近个傳統市場安到「自由市場」，臨暗頭開始做生意。時間一到，市場裡背一蕊一蕊黃黃光光个電球陸陸續續點著，攤仔个商品一項一項排出，市場像目陰目陽个巨人，一息一息啟氣返魂。跔等佢展現生命力量，附近个伯姆叔婆、阿姨、阿姑做下出動咧，連外勞也遽遽搵等中風个老阿婆參加這逐日舉辦个「拍賣會」，這就係「自由」个魔力。

佢姆係一個小學先生，學生仔放學過後，囤一日个壓力，就愛「自由」一下去市場買東西，為臺灣个經濟做貢獻。佢這個孝子，輒常愛陪阿姆去遠市場順續搵東西，三不二時還愛試食點評，安腦阿姆買東西个心得：這家个鹹豬肉毋會死鹹、該家个焙煙腸毋會忒肥、前排賣个魚仔較萋、後背个愛玉係佢最好食个……。跔等交關過个攤仔緊行緊多，阿姆个皮包仔緊來緊扁，佢手叮个油紙袋也緊來緊重。

「自由」个商品百百種，做得講係「麼个都有，麼个都賣，麼个都無奇怪」。阿姆毋單淨在這買各種食材摻衫褲鞋襪，連遮仔、被骨、鑊頭、電扇這兜分佢想毋解个生活用品也會買。有一年八月半，家家屋屋愛焙肉，市場肚尖到就像接年活動，逐个人使錢像背銃仔相戰。阿姆滿面紅光，看起來比相打雞還較有精神，佢摻手叮个袋仔交分佢過後，就單人獨馬春入前線，等佢再過春出來个時節，當風神个拿等佢个戰利品——奔馬桶个蓋仔。

「金錢當珍貴，生命價值高，若係為自由，麼个都無愛。」雖然佢姆逐擺去自由市場買東西，總係拿出當潑辣又毋驚死个精神來消費，其實佢知佢全係為著屋下大細，屋下麼人好食麼个，好唸麼个，麼人好著仰般个衫褲，需要麼个東西……，佢全記在心肝肚，毋識毋記得。

阿姆在「自由」裡肚買屋下人个需要，在「自由」裡肚準備屋下个溫暖。阿姆追求个「自由」，牽連等屋下人个幸福。